





## **Акафист**

# **Святому блаженному Николаю, Христа ради юродивому, Псковскому чудотворцу**

### **Кондак 1**

Дерзновенный молитвенниче о людех града Пскова, святыи праведный Николае блаженне, приими наше похвальное пение в похвалу тебе возносимое и не престай заступати град наш предстательством твоим пред Господом Богом. Якоже иногда предстал еси Царице Небесней с иными псковскими чудотворцами, молящися за отцы наша во дни тяжкия нашествия вражия. Мы же, тя имуща, яко заступника и чудотворца нашего преславного, в похвалу тебе зовем:

Радуйся, дерзновенный молитвенниче и заступниче наш, святыи праведный Николае блаженне!

### **Икос 1**

Ангела земнаго и нашего теплаго и неусыпнаго молитвенника видим тя, святыи праведный Николае блаженне. Ангельским бо житием пожил еси посреди людей града нашего, преславне; в рубище, нагоде, в

бесславии и пощениях претрудный подвиг юродства на ся взем. Сего ради прими от нас похвалы сия:

РАДУЙСЯ, истинное блаженство нищих духом о Господе людям показал еси.

РАДУЙСЯ, сею добродетелию Царство Небесное от Господа стяжал еси.

РАДУЙСЯ, плачем временным на земли утешение вечное на небеси получил еси.

РАДУЙСЯ, кротостию и незлобием наследие обетованной земли приял еси.

РАДУЙСЯ, милостию и состраданием согретое сердце имел еси.

РАДУЙСЯ, чистотою и непорочностию сердца своего зрети Господа сподобился еси.

РАДУЙСЯ, дерзновенным миротворцем пред царем земным явился еси.

РАДУЙСЯ, за сие от Царя Небеснаго сыном Божиим наречен еси.

РАДУЙСЯ, изгнание, поругание и бесчестие от людей претерпел еси.

РАДУЙСЯ, заушение, поношение и укорение кротко преносил еси.

РАДУЙСЯ, зол глагол Христа ради слышал еси.

РАДУЙСЯ, веселие вечное, яко мзду многую за оклеветание, ложь и досаждение унаследовал еси.

РАДУЙСЯ, дерзновенный молитвенниче и заступниче наш, святой праведный Николае блаженне.

## **Кондак 2**

Видя суету мира и тленность благ земных, святой праведный Николае блаженне, ты нищету духа пред людьми неискушенными в духовных подвизех на себе приял еси. Наготою тела бременаго и лишения всяческими сию нищету духовную ты сим людем показал. Обаче молитва теплая, слезами согретая и обличение дерзновенное, сильна духом пред людьми благочестивыми себе явил еси, подвизая пети их Творцу Богу о тебе ангельскую песнь: аллилуиа.

## **Икос 2**

Разум дивный дарова тебе, блаженне Николае, Господь Бог, егда ты являл еси себе пред лицом людей неискушенных верою, неведущих разумети величие подвига твоего, нища духом, видом скудна и разумом лишена, да восприимеши на ся поношения и поругание зельное. Пред царем же озлобление многое на люди града Пскова имущим, величие духа своего показал еси, претворяя сим гнев его на милость: мы же зряще тя, яко великаго ходатая своего с любовию зовем ти:

РАДУЙСЯ, разум чист и свободен от страстей подвигом юродства стяжавый.

РАДУЙСЯ, величие и силу духа, нищетою телесною приобретший.

РАДУЙСЯ, злохуления от людей неверующих высоты подвига твоего приявый.

РАДУЙСЯ, за сих людей, яко за друзей своих пред Господем моливыйся.

РАДУЙСЯ, яко ходатай дерзновенный, пред царём озлобленным за них же представший.

РАДУЙСЯ, нелицеприятным обличением гнев его укротивый.

РАДУЙСЯ, дух новоградскаго затворника АРСЕНИЯ преподобнаго своим пред ним явлением воскресивый.

РАДУЙСЯ, завет сего праведника не мстити людем псковским своими словесы подтвердивый.

РАДУЙСЯ, молитвами угодника сего, оружием милости Божия к людем нашим явился еси.

РАДУЙСЯ, в сем подвиге, братом духовным угодника сего и нам показался еси.

РАДУЙСЯ, и ныне предстоя с ним у Престола Божия, за ны молитву приносиши.

РАДУЙСЯ, о прощении согрешений наших пред ГОСПОДЕМ ходатайствуеши.

РАДУЙСЯ, дерзновенный молитвенниче и заступниче наш, святой праведный Николае блаженне.

### **Кондак 3**

Силою Божественною свыше укреплен, ты подвиг юродства Христа ради доблественно совершил еси, славя сим подвигом великое имя Святыя Троицы, и научил нас, присных твоих, вкупе с тобою пети БОГУ: аллилуиа.

### **Икос 3**

Имея в себе твердую любовь ко Господу, ты бренное тело свое всяческим лишениям повергал еси, не давая плоти своей и малейшаго угождения похотем ея, ведая, яко за сие озлобление телесное любезным сыном пред Отцем своим небесным явишися, и яко сын Его добрый будеши, вкупе с Ним радоватися о возвращении и нас блудных сынов в Его объятия великого Отца нашего и поющих тебе, яко великому угоднику своему:

РАДУЙСЯ, силою свыше на трудный свой подвиг укрепленный.

РАДУЙСЯ, яко мечем, терпением зельным, препоясанный.

РАДУЙСЯ, яко тяготою подвигов твоих похоти телесныя умертвивый.

РАДУЙСЯ, яко молитвою своею любовь ко Господу стяжавый.

РАДУЙСЯ, Святыя Троицы усердный молитвенниче.

РАДУЙСЯ, Пречистыя Владычицы сыне любезный.

РАДУЙСЯ, любовью Христовою, любовь к людям приобрел еси.

РАДУЙСЯ, сею любовью еще на земли многоплодны плоды израстил еси.

РАДУЙСЯ, о возвращении нас блудных сынов ко Господу радуешься.

РАДУЙСЯ, участие в великом пире радования, устроенном Господем о нашем к нему возвращении, приемлещи.

РАДУЙСЯ, яко воистину великим в царствии Божиим явился еси.

РАДУЙСЯ, яко воистину многую мзду от ГОСПОДА получил еси.

РАДУЙСЯ, дерзновенный молитвенниче и заступниче наш, святыи праведный Николае блаженне.

## **КОНДАК 4**

Бурею негодования и озлобления смятеннаго царя грознаго ты вкупе с преподобным игуменом Корнилием и людьми, скорбию отягощенными, встретил еси, блаженне Николае. Ов убо ризами священства украшен, яко иерей алтаря Господня представ пред ним, ты же рубищем покровен явился еси. Оный молитвою, осенением креста и окроплением священою водою честь царю воздавая, ты же обличением небоязненным гнев его укрощая, за люди своя ходатайства принесли еси ему, да поют они благодарно Господу избавителю своему: аллилуиа.

## **Икос 4**

Слышав грозный царь небоязненныя словеса твоя, блаженне Николае, о Божиим воздаянии и о суде его праведном тобою вещаемыя, за творимыя им обиды людем неповинным, яко агнец кроткий стояше он пред

тобою, видя в тебе пред собою, яко восставшего из сени смертней затворника Новградскаго Арсения, вещавшего ему подобныя словеса, егда он бе в Новограде в тесной храмине его. Мы же в сем обличении твоём, видим тя, яко великаго пророка Илию, обличавшаго царя Ахаава с нечестивою царицею его, зовем тебе:

РАДУЙСЯ, яко пророк БОЖИЙ, грозныя проречения царю вещавый.

РАДУЙСЯ, за обиды творимыя им судом Божиим грозивый.

РАДУЙСЯ, преподобному Арсению в сем деле святом подобниче.

РАДУЙСЯ, с Корнилием игуменом святым, великий за люди своя поборниче.

РАДУЙСЯ, святыня дел твоих покорность царскую яви.

РАДУЙСЯ, небоязненные словеса твоя, яко гром его устраши.

РАДУЙСЯ, сим ходатайством, плачущия люди утешил еси.

РАДУЙСЯ, мир в смятенных людех водворил еси.

РАДУЙСЯ, благодарити Господа их научивый.

РАДУЙСЯ, величие Божие, в немощех творимое, людем показавый.

РАДУЙСЯ, служителю ближним искренний.

РАДУЙСЯ, ходатай Божий непостыдный.

РАДУЙСЯ, дерзновенный молитвенниче и заступниче наш, святой праведный Николае блаженне.

### **Кондак 5**

Богосветлою звездою возженной во граде Пскове, именуем мы тя, святой и праведный Николае блаженне. Аще бо облак поношений и злохулений закрываху величие духовнаго подвига твоего от взора людей с тобою живших, и видимая нищета духа и рубище твое отвращаху от тебе многих ближних твоих, дабы познати светлость души твоея. Не укрыся же все сие от духовнаго взора царя Иоанна, усмотре бо он ими в тебе великаго светильника Божия, пред алтарем правды Господней поставленнаго, укроти сердце свое пред тобою и послушаша тебе. Людие же избавленнии от царского гнева по ходатайству твоему, возопиша благодарне Богу: аллилуиа,

### **Икос 5**

Видяще тя псковския людие по скончании шести годин и восьми дний от сотворения тобою подвига спасения града их от царскаго гнева, усопша, притекаху к мощем твоим святым, просяще прощения за обиды, принесенныя ими тебе во время жития твоего, и благодаряще Бога за многократныя милости твоя к ним, святой праведный Николае блаженне. Честно святое тело твое в соборный храм Святыя Троицы принесоша и тамо погребоша, со слезами воспевая тебе хвалы сия:

РАДУЙСЯ, праведниче предивный.

РАДУЙСЯ, преподобных сомолитвенниче.

РАДУЙСЯ, исповедников сопричастниче.

РАДУЙСЯ, терпением своим мучеником уподобился еси.

РАДУЙСЯ, поношения и клеветы прияв с праведными равный явился еси.

РАДУЙСЯ, даром прозрения обогащенный.

РАДУЙСЯ, творением чудес прославленный.

РАДУЙСЯ, граду Пскову новый молитвеииче познался еси.

РАДУЙСЯ, заступником твердым пред нами предстал еси.

РАДУЙСЯ, душа твоя святая, во убеленных ризах ныне предстоит Христу.

РАДУЙСЯ, мощи бо твоя честныя истощают благодать.

РАДУЙСЯ, дерзновенный молитвенниче и заступниче наш, святой праведный Николае блаженне.

## **Кондак 6**

Проповедником неложным правды Божией был еси на земли, святче Божий Николае блаженне, обличая людския неправды и беззакония, укоряя за лицемерную любовь их к Богу и людем. Сего ради и многократно биен был еси от них, осмеян и поруган. Ты же, Иовлеву терпению поревновал еси, и на распятого Господа взирая, во умилении сердца твоего незлобиваго пел еси Ему: аллилуиа.

## **Икос 6**

Воссия в возлюбленной Господом БОГОМ душе твоей свет правды Божией во вся дни жития твоего, блаженне Николае. Сего ради, видяще сей свет, людие Божия притекаху к тебе, да просветиши сим светом и их души, ищущие света сего. Ты же, с радостью и любовью примером жития твоего святаго, свет божественный возжигал еси в них. Они же, просвещении светом сим, в похвалу тебе зовут:

**РАДУЙСЯ**, светоносный носителю правды Божией.

**РАДУЙСЯ**, ревностный хранителю чистоты сердца твоего.

**РАДУЙСЯ**, ослепленныя греховными деяниями обличивый.

**РАДУЙСЯ**, жестокость нравов их показавый.

РАДУЙСЯ, движимый любовью к людям, утешитель скорбящим был еси.

РАДУЙСЯ, подвигнутый милосердием, целитель болящим познался еси.

РАДУЙСЯ, света правды Божией сеятелю.

РАДУЙСЯ, земли богоделания пахарю.

РАДУЙСЯ, всех притекающих к тебе приемляй.

РАДУЙСЯ, и нечтущих тя с любовью объемляй.

РАДУЙСЯ, обидящим тя добродетели творивый.

РАДУЙСЯ, за хуления и поношения их друзьями своими именовавый.

РАДУЙСЯ, дерзновенный молитвенниче и заступниче наш, святой праведный Николае блаженне.

### **Кондак 7**

Хотя Вседержитель Господь и Его Пречистыя Матерь, прославити преславных угодников своих, в тяжкия дни нашествия вражия на град Псков. В дивном видении показа Владычице Богородице страцу Дорофею небесных заступников града сего. В сонме их и ты предстал еси в видении сем пред стопами Заступницы рода христианскаго, блаженне Николае, прося купно с ними милосердия Божия на люди возлюбленнаго града твоего. И егда ты услышал еси

совет Пречистыя страцу Дорофею изреченный, воспел еси вкупе с угодниками Божиими, бывшими с тобою: аллилуиа.

### **Икос 7**

Новое прославление тя угодника Божия, вкупе со иными угодниками псковской земли, святой праведный Николае блаженне, является великим новым благоволением Божиим к тебе и нам, людем Его. Показует бо Благий Господь нам грешным яко не тщетны бысть труды и подвиги твоя пред Ним. Мы же в сем прославлении твоём видим Его милостей величие на нас изливаемых, благодарне покланяемся Ему Всеблагому о тебе и тебе сии похвалы поем:

РА ДУЙСЯ, угодниче Христов во свете заповедей Его ходивый.

РАДУЙСЯ, любимиче Пречистыя, любви Ея к людем подражателю.

РАДУЙСЯ, Антония Печерскаго, отца иноков сомолитвенниче.

РАДУЙСЯ, преподобномученику Корнилию о нас грешных соходатаю.

РАДУЙСЯ, князю Всеволоду-Гавриилу в себе к людем равный.

РАДУЙСЯ, князю Довмонту-Тимофею в ревности единоправный.

РАДУЙСЯ, печальниче о ЛЮДЯХ, святителю Нифонту подобный,

РАДУЙСЯ, вере равноапостольному Владимиру подражавый.

РАДУЙСЯ, преподобному Савве Крыпецкому в лишениях равный.

РАДУЙСЯ, преподобному Ефросину в молитвах сопричастный.

РАДУЙСЯ, дух обличения Новоградскаго затворника Арсения в себе носивый.

РАДУЙСЯ, печать Духа Святаго на себе неврежденно сохранивый.

РАДУЙСЯ, дерзновенный молитвенниче и заступниче наш, святой праведный Николае блаженне.

### **Кондак 8**

Странное и неудобопонимаемое людям житие себе избрал еси, блаженне Николае, под покровом нищеты духовныя, ты великое богатство благочестия духа скрывал еси, и якобы лишенный разума, великую мудрость Божию в себе имел еси. От подвига к подвигу, творимому тобою к Небесному Царствию твердо и неуклонно шел еси. От добродетели к добродетели переходя, неленостно Господу угождал

еси, поя в сокрушении сердечном ангельскую песнь:  
аллилуй а.

### **Икос 8**

Всего себе предал еси воли Божией, великий подвижнике Христов Николае блаженне, не имея плоти своей покоя ни днем ни нощию. Небо покровом, стогны града жилищем избрал себе, пречудне, не ища места идеже препokoити тело твое, и в тишине духа воздати Господу молитву свою. Сего ради прими от нас похвалы сия:

РАДУЙСЯ, Пресвятая Троицы неусыпный молитвеннике.

РАДУЙСЯ, ангелов богоприятный собеседнике.

РАДУЙСЯ, стогны града молитвою твоею облагаухал еси

РАДУЙСЯ, землю его твоими стопами освятил еси.

РАДУЙСЯ, страннике, не имевый где главу подклонить.

РАДУЙСЯ, пресельнике, не знавый телу своему покоя.

РАДУЙСЯ, победы тезоименитое имя имевый.

РАДУЙСЯ, сею победою от Господа во дни жития своего прославленный.

РАДУЙСЯ, яко тобою жестокия сердца в мягкий воск претворяются.

РАДУЙСЯ, яко тобою буйныя нравы тишину благодатную обретают.

РАДУЙСЯ, яко тобою слезы обидимых людей иссушаются.

РАДУЙСЯ, яко тобою скорбящие радостию неизреченною исполняются.

РАДУЙСЯ, дерзновенный молитвенниче и заступниче наш, святой праведный Николае блаженне.

### **Кондак 9**

Многия скорби и великия поношения претерпел еси в житии своем, святой праведный Николае блаженне. Кто бо возможет исчислити бесчисленное множество скорбей, принесенных тебе людьми неведущими высоту подвига твоего? Кто возможет словесами красноречивыми изрещи глубину любвеобильных стремлений сердца твоего ко Господу и людям тобою исполняемых? Токмо Един Сердцеведец ГОСПОДЬ возвыси тя праведника своего превыше всех благочестно живших с тобою людей и во смирении Ему взывавших: аллилуиа.

### **Икос 9**

Витийство краснословесных глаголов изнемогает достойно прославити милости привеликия Господом

Богом деemyя ко прославлению угодников Своих святых. Тако сбытcя милость Его и на тебе, блаженне Николае, угодниче Христов, во дни земнаго жития твоего худороднаго, облеченнаго в рубища видим тя, представшаго пред очами грознаго царя дерзновенно указующаго ему греховность жития его и покорившаго жестокость сердца его мнительнаго и сим подвигом изумившаго людей, слышащих о сем. Мы же любовь к тебе объемлемыя, похвалы сия тебе глаголем:

РАДУЙСЯ, нищетоу высокая стяжавый.

РАДУЙСЯ, смирением велие духа обретший.

РАДУЙСЯ, всеми обидимый, обидимых спасший.

РАДУЙСЯ, всеми поношаемый, сильных мира сего обличивый.

РАДУЙСЯ, лишенным разума именуемый, мудрость великую пред царем показавый.

РАДУЙСЯ, рубищами покрытый, свою душу облеченную светлою одеждоу богоразумия явивый.

РАДУЙСЯ, кроткий, яко агнец пред людьми, дерзновенен же пред царем.

РАДУЙСЯ, молчаливый пред обидящими, красноречивый же пред властителем.

РАДУЙСЯ, не имевый заступников, заступником прославленный.

РАДУЙСЯ, не ведавший ходатаев, Сильным Ходатаем возвеличенный.

РАДУЙСЯ, лишенный права, град свой от разорения спасший.

РАДУЙСЯ, лишенный пристанища, людей обиталища лишитися воспретивый.

РАДУЙСЯ, дерзновенный молитвенниче и заступниче наш, святой праведный Николае блаженне.

### **Кондак 10**

Спасительное свое промышление к нам грешным и недостойным рабом своим показа на тебе Господь Бог, Николае пречудне, являя пред нами тя велика нашего ходатая и заступника пред Ним. Да не заблудим от пути своего спасения, но взирающе на тя светильника нашего пресветлаго, правыми стезями шествуем ко спасению душ наших и о тебе, яко о благодетеле своем, поем: аллилуиа.

### **Икос 10**

Стеною и ограждением бысть тебе имя Святыя Троицы, Святой праведный Николае блаженне, призыванием бо пречуднаго имени сего, ты спасл еси душу свою от нечистоты и молитвами к Ней огради тело свое от соблазной и похотей греховных. Сего

ради и достоин явился еси предстояния близ престола Пресвятыя Троицы чистою душею своею и пребывания честными мощами своими в пречудном храме сем. Мы же покланяемся Господу о тебе яко о молитвеннике и заступнике нашем усердием, похвалами ублажающе тя сими:

РАДУЙСЯ, предстоятелю Троицы Святыя достойный.

РАДУЙСЯ, ходатаю о граде Пскове неусыпный.

РАДУЙСЯ, честными мощами твоими верных людей освящаеши.

РАДУЙСЯ, молитвами твоими от бед спасаеши.

РАДУЙСЯ, со блаженными князьями Гавриилом и Тимофеем триедиными усты молитвы своя Господу возносиши.

РАДУЙСЯ, со иными святыми града Пскова девятчисленный собор заступников, людей благочестивых града нашего украшаеши.

РАДУЙСЯ, пречудных игуменов Спасовой обители Авраамия и Василия собеседниче.

РАДУЙСЯ, предивных инокинь Иоанновой обители Марфы и Евпраксии сопрестольниче.

РАДУЙСЯ, тайному подвижнику Божию Иоанну затворнику потаенными подвигами равный.

РАДУЙСЯ, преподобномученику Иоасафу  
Снетогорскому в преподобии и праведности  
сопричастниче.

РАДУЙСЯ, тебе бо дадесе власть от ГОСПОДА людем  
милости изливати.

РАДУЙСЯ, тебе бо дадесе великое благоволение  
Божие люди верныя от обидящих избавляти.

РАДУЙСЯ, дерзновенный молитвенниче и заступниче  
наш, святой праведный Николае блаженне.

### **Кондак 11**

Пение умиленное возносимое тебе нами  
недостойными приими, боголюбче истиннаго Бога,  
Николае блаженне, и вкупе с нами молися Ему  
Всеблагому о нас, любящих тя и почитающих с  
любовию святую память твою. Тебе бо дадесе  
благодать молиться за ны и избавляти нас от врагов  
наших, ненавидящих и обидящих нас. Ведаем тя мы  
вси самого претерпевшаго скорби, поношения и  
обиды и приемшаго их на спасение души своея и  
могущаго, яко искушенный в сем, и нам искушаемым  
помощи и воздвигнуть нас вкупе с тобою пети  
Богу: аллилуиа.

### **Икос 11**

Светоносительный светильник был еси не токмо во  
дни жития своего, но и по блаженной кончине своей,

Николае блаженне угодниче Христов. Сияя сим светом на людей, ищущих вечнаго спасения души своей и вечной правды Божией, освещай благия желания и намерения наша, угодниче Божий, и приведи нас к Солнцу правды ХРИСТУ БОГУ нашему, поющих Тебе:

РАДУЙСЯ, свечильниче неугасимый веры православныя.

РАДУЙСЯ, молитвенниче неусыпаемый о людех христоименитых.

РАДУЙСЯ, печальниче за теснимых и угнетаемых.

РАДУЙСЯ, заступниче за обидимых и поношаемых.

РАДУЙСЯ, обличителю пороков и грехопадений.

РАДУЙСЯ, возбудителю в нерадении живущих.

РАДУЙСЯ, подвиги во имя Господа деемая благословляеши.

РАДУЙСЯ, желающим спаситися, путь верный указуеши.

РАДУЙСЯ, светом правды Божия всех просвещаеши.

РАДУЙСЯ, благодатию Божественною нас осеняеши.

РАДУЙСЯ, укрепление верою спасаемых.

РАДУЙСЯ, упование подвиги деющих.

РАДУЙСЯ, дерзновенный молитвенниче и заступниче наш, святой праведный Николае блаженне.

### **Кондак 12**

Всего себе благодатных даров исполненного соделал еси еще в земном житии своем, святой праведниче Николае, избрав претрудный подвиг юродства и нищеты духа. Сего ради и сподобился достигнути бесстрастия и совершенного незлобия. И ныне в небесных чертозех стоиши у подножия ног агнца Божия и молиши о нас, просящих твоея помощи и зовущих Богу: аллилуиа.

### **Икос 12**

Поюще пречудное житие твое, любимиче Божий, святой Николае блаженне, с любовью почитаем святую память твою, с верою надеющиеся на святяя молитвы твоя, чаем получить благая на земли от Господа сил и вечное спасение по кончине земнаго жития нашего. Ты же, святче Божий, благодатию данною тебе от дароподателя Бога, непрестанно возгревай в нас любовь нашу к тебе и ближним нашим и научити хвалити тя тако:

РАДУЙСЯ, веру непорочную в Господа в нас вселяеши.

РАДУЙСЯ, надежду на спасение наше укрепляеши.

РАДУЙСЯ, благословением своим на подвиги веры нас осеняеши.

РАДУЙСЯ, прибегающим к тебе милость даруеши.

РАДУЙСЯ, милосердие творити нас научаеши.

РАДУЙСЯ, незлобия рачителю.

РАДУЙСЯ, терпения стяжателю.

РАДУЙСЯ, чудеса по смерти твоей у гроба твоего творивый.

РАДУЙСЯ, и нас незлобивыми быть учивый.

РАДУЙСЯ, со всеми святыми Божиими радости вечныя исполненный.

РАДУЙСЯ, со ангельскими силами на служение Господу на веки сопричтенный.

РАДУЙСЯ, дерзновенный молитвенниче и заступниче наш, святой праведный Николае блаженне.

### **Кондак 13**

О, святой праведниче Божий, Николае блаженне! Приими наше пение тебе нами приносимое, от любящих и почитающих тя рабов Христа Бога нашего. Не возгнушайся наших нечистых уст греховных, но помози нам веру православную до конца жития нашего непорочно соблюдать, тихо и

безмолвно на земли житие наше пожити, любя Господа Бога и всех ближних своих всем сердцем, всем помышлением и всею крепостию своею, и сподобитися во царствии небесном вкупе с тобою и со всеми святыми воспевати Пресвятую Троицу в бесконечныя веки песнь: аллилуиа.

## **МОЛИТВА**

О, пречудный и дивный угодниче Христов, святой праведный Николае блаженне! К тебе, яко молтитвеннику нашему усердному прибегаем, к тебе, яко заступнику нашему крепкому своя прошения приносим. Помози нам, Святче Божий, помози нам, тепле тебе вопием! Помози нам в наших житейских попечениях, наипаче же в нашем спасении душевнем. Ты бо, поношаемый в житии своем, можеши нас от поношений и клеветы спасти. Ты бо, обиды терпевший, можеши нас от ненавидящих и обидящих нас людей избавити. Тебе бо, дадеса от Господа Бога благодать недуги исцеляти, страсти утишати и пороки исправляти. Исцели наша болезни и немощи телесныя, уврачуй недуги наша душевныя гордостью и нерадением о своем спасении нами же наведенныя. Угаси пламень страстей и пороков наших, отдаляющих нас от любви и правды Божией. Даруй нам дар пламенной молитвы, дар теплой любви к Богу и людям, дар милосердных дел творения. Ниспошли нам силу и ревность Божию: обидимыя защищати, скорбящия утешати, бедствующим помогати, малодушных укрепляти, за гонимых заступатися и во всех нуждах своего

ближняго попечение неослабное имети. Сохрани страну нашу и всех людей ея верою и благочестием в ней живущих в мире и тишине, от вражия нападения избавленных. Заступи за град наш, твердую веру ты, яко заступника своего, имущий от тлетворных болезней, от поветрия и мора. Сохрани и храм сей, имущий святыя мощи твоя, от разорения и оскудения в нём молитвеннаго подвига верных людей. Старцем даруй укрепление в немощех их, юношам даруй в вере утверждение, младенцем благочестное воспитание, мужам и женам в добродетелех подвиг неустанный. Да видяще в тебе нашего твердаго учителя, помощника и заступника, прославим вкупе с тобою пречудное имя Святыя Троицы, Пречистую Матерь, Сына Божия и всех святых, от века Господу угодивших. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

†

НОВОЕ  
\* НЕБО